

黎氏家集

四

4
蘇氏家集

侍雪堂詩鈔卷第五

遵義

黎兆勳

嶽伯庸

感春十五首

楚澤上朝碧江流浩以寒年芳倏散春事寔遽闌東
逝渺何極利涉輕波瀾勞逸各自適於途未為寬我思
日泱泱古道誠漫漫一心且難靖詎必羣情安

蕭然掩關坐不識在官府時契無言子岑寂忘爾汝幽
幽舍人居藹藹物華睹禽喧知林霽庭響識宵雨茗香
童僕來酒醒客愁聚三年勞奔走一室閒情補海嶽有
仙人思之不能語

三楚多秀士古人諒難見遠懷孟浩然復念陸鴻漸浩然洵清發士源匪虛讚羽也為伶正出處抑何謾不逢李齊物身世日羈絆吁嗟布褐囊徒悲祿山亂一賦天未明沈憂滿淮甸

黃公稱善醫寢食必先治侯生稱善筮說卦重人事名理為樞機大道絕私意一技歧其途於術未為至感君機變才自是青雲器惟憐多難日不惜勞心偽

翦彩成陽春不及芳華新結交多嘉客不如逢故人我思洵紆結幽意竟何陳青陽耀冠蓋入門誰與親詎無瑤臺月照君瓊樹林婉婉曉禽語和鳴殊有因物情自

相感所貴全其真

客歌古俠吟倚劍望遙夕惟觀物鏽澀不入珍異席徐
君沒已久莊生說堪擲世途有遷易智士羞短策感君
多黃金不重沈淪客及鋒甯有時持此將安適神交非
爾心解贈亦當劇

山雨濯林春驚飈漲紅紫紛吾魂夢勞風光念鄉里在
昔侶溪山劇談治亂理三王遞秦漢議論無終始間從
老農遊田間話耒耜蠶衣與陵烏氣化求所以十載離
索思予亦就衰矣曼胡逢故人悵悵儒冠子

時平尚禮樂世變求奇英豪俠有真士出門生命輕信

陵重朱亥宣孟逢彌明劇孟感袁盎趙氏存程嬰古人
忠烈性不必深知兵義非俠不立俠非義不成卓哉贊
皇語似惜英特情

海客從東來羅縷溟渤景縱橫濟時畧羣材紛退屏山
人能說山狹隘出機警自非江海才欲語先退省祁連
有冰山蜀郡有火井地氣使之然兩境不能併

荒哉吳會雲渺渺發悲慨茗葦承堂榭愚亦知其悖吾
傷武安君括也將必敗吾憐望諸君騎劫焉能代人言
山可挾未見揭恆岱白日明天關疇能通帝載矯誣自
昭昭坐斃誠憤憤

夜步黃鵠磯夕月已低墜列宿垂光芒其精實在地倒
景凌長虛形色了無異君看江漢流陳蹟迷人思古來
英雄業勲名豈虛寄烈烈龍虎姿矯矯勤王志

嘉辰氣清霽行復登高臺長嘯縱春目悠悠天海懷緬
懷魯連子悵望樂生才時危重高節志鬱生沈哀砢磷
雷室車大澤空徘徊洪波振不息日晏蠻雲頽勁草櫻
飄隧饑禽號水隈豈不念良會江籬非我媒

牆頭紅紫花藤蔓蔽荒廈婀娜搖春煙蒙茸出亂瓦念
昔飛妖燦九衢變荒野白骨連湖寒空城接山赭邇來
事結構大道耀輿馬棟宇雖未崇士女復都雅惟楚繁

會區樓觀耀華夏豪富詎無因喪亂匪虛假往事日蕭索春淒鄂城下

羈客念鄉國悲來成嘯歌羈鵠爾何鳴詎識鄉愁多念昔與君別衡門依女蘿風雨生離聲眷茲庭樹柯睽墟洵阻絕竹廟空嵯峨音塵隔長路鴻雁難經過甌脫久相視奈此蠻虜何

事業何草草少年今忽老百歲誠偶然夢幻自顛倒愧茲和光子似識聲華好歡樂方榮身陰蟲食其腦誰云丈夫志百念謝機巧要當守支離來復神所保澹泊多好懷幽子發其道

八月十一日招劉濬之孝廉徐子楞山人龔九曾
農部陸用皆記室飲酒席上送陸君返常州

東南有漲海西北有高樓不假風雨聲安知天地秋戰
伐羨壯士錦帶腰吳鉤長纓豈不貴斑白增予愁乾坤
洵多事國患何日休北門思寇準江海懷錢鏐陣拓
龍虎軍風清帝王州蕭蕭涼秋節楚水多寒流驚飈振
白日逸興凌滄洲徐叟發遙嘅陸子嫺清謳斗酒醉江
漢空言誰見收明日鄂城東送君東南遊行客勿太息
居人聊自留丈夫歷艱險撫劍生百憂零落顧榮扇悽
涼張翰舟挂冠東都門逢萌真我儔孰云意氣輕臨難

多綢繆為君歌一曲鄉思飛黔陬

澗蘭

澗瀉寒泉苔滿岑紅芽低簇碧雲深
九秋珠露石林悶黯黯芳風何處尋

畫稿吟懷久寂寥夜來鄉思繞山椒
菖蒲花紫不歸去秋暝沙灘平板橋

溪竹

蒼雲十畝綠漪侵疎引溪風接遠林
晚歲窮交誰健在盍教青士伴孤吟

三分水竹一茅椽每對月明思輞川
雨葉煙梢入宵夢

此君相待涼風天

中秋夜登黃鶴樓圯址月下偕莊麟之少尉飲酒
鶴樓一炬成焦土鐵鎖橫江走蠻虜戰艦東馳南楚空
殘垣破屋悲三戶今歲洪流忽橫潰楚甸波濤襍風雨
已拌春夏愁漏天豈復郊原事禾黍前日江風秋怒號
四山雲霧豁清睹城頭朗月挂明鏡江上晴雲搖白羽
我屋深沈近戟轅姮娥例不窺官府策杖來登城上臺
凌雲下瞰煙中浦城闕星河近郭低戍樓鐙火沿江吐
冰輪照人若可掇玉露點衣輕欲舉坐念年時閱憂患
鼉憤龍愁漭無所幾曾清景從庾公卻笑參軍異孫楚

叢桂山寒憶鄉國塵寰我愧飛仙侶中秋得月誠偶然
萬頃寒光濯肝腑朗吟不去歌徘徊明日新詩詎堪補

都撫隄藕花行二首

咸豐二年粵寇陷武昌行省此水為婦女死難之所

藕風寒芙蓉溼露珠白姬娃泣香明香滅人不知隄陰
又見鴛鴦集蠻雲盡斂荒波香藕絲夜績冰絃長華容
鼓瑟明月璫湖颺永夜吹清霜

楚王臺榭成荒煙都隄荷花清且妍凌波宛約離塵緣
芳心夜葬清涼天清涼天玲瓏月年年風露荷花發羅
襪成塵豔骨銷瑤臺幽恨無時歇

晚出公府登城上樓

暮雲西下楚山青夜色昏黃入杳冥我愛長江洗明月
天從低樹掠飛星登樓客去憐王粲滅燭秋空望洞庭
領取十年塵鞅夢戍鈴漁笛酒初醒

早起

濤飛雲起海天荒王濬樓船擁萬檣影落星河人早起
聲嚴鼓角夜初長蒙塵忍憶唐天寶對鏡沈思晉武昌
不奈五更騎馬去漢南山色曉蒼蒼

九日偕劉瑞符鈐十一兄小飲

劉曲
阜人

中原喪亂語悲辛九土黃流日愴神坐久危言鄉國淚
飲酣回首戰場春地當十部來從事秋到重陽憶故人

歌罷紫芝招隱士菊花萸酒且相親

王子壽相心比部以詩寄懷奉報二律

未曾識面頻通訊細讀新詩意灑然公自讀書酌歲月
我疑避世學神仙乾坤歌哭天難問江漢風騷集已傳
深惜陽湖詩老逝一篇誰與共纏綿

慨慕

陽湖詩人徐子樛讀君漆室吟心深

老我流年少宦情苦吟寒夜數殘更潮乘缺月九江動
樓倚繁星孤角鳴長柄攜鏡懷故侶短衣射虎悵平生
捷書盼斷淹留客那許愁過漢將營

輓徐子樛山人

名華廷常州布衣無子所著有一規八棱硯齋詩集咸豐十年九月

客死武昌

望古情生文感舊淚如霰朝出東郭門獨挂徐君劍憶
昨識君日塵埃走僮賤抗心古蘭陵詞賦識豪彥妙語
駢連珠清詞約歌扇孝穆之家法綺麗才筆擅下賢藤
笈游羅隱白衣譴十上難遂名華藻黜心豔鏤塵析微
芒深刻自成卷孤吟絕衆獲晚境特一變平生嘔心詩
神瘁八棱硯老屋毘陵城歸期夢魂魘酣飲黃鵠磯悲
吟自邀餞誠知多難日客遊心益倦胡來旅人占焚巢
哭鄉縣庚申四月賊陷常州君聞之數日不食自然憂患深殞命誰能見
傷心長往日尚約訪丞掾藉予菊花尊慰爾悲秋宴有

懷不吾語忽睹城東竈無家魂空翔席地孤墳奠饋潔
憶芳儀忤物太高捐骨相憐虞翻哀歌遂成傳

喜莫邵亭五兄自都下至武昌

昔別期早歸能來夢不到兩枉燕市書楚客缺一報情
知去國遠客久日虛耗迴車計初失覆轍戒重蹈奈何
延秋門夜半城烏噪都人倉皇奔朝市走夷盜此時遠
相念心類風中燾路阻音訊遲憂來誰與告漢水斷行
客朔風三日暴黃花媚幽獨閉戶愜清好剝啄驚打門
僕呼遠客造披襟出相見一叟老而耄初疑非故人細
視欲驚倒君顏誠近凋揮淚相慰勞尚羨齒牙牢共飽

官倉糙楚天漬雲雨江漢因秋滂薄寒峭鐙影鑪火發
新竈聽雨宵聯牀檐溜走壁瀑讀君潛江詩我心增感
悼款曲洲渚情促膝心自禱鄂城新篘熟蝦蟬深夜犒
同諮出山事我悔君亦懊鄉愁從中來可遏不可導

送邵亭之懷甯縣署

初雪辭殘秋鴻遊江海地瀟山無道人湖波慘蒼翠坐
念皖公山此道行不易孤帆待遊客邁往必深至南中
諸故人邵亭實好事擬勝窺精靈鉤隱竊神異斯行匪
得已陟岡望予季飄飄江漢雲遲留且虛寄懷君不吾
與既與復見棄遑遑謀道心歲晚不一遂穹蒼今何時

海嶽混魑魅 皇風日衰頽漢道豈凋墜於忽龐公歌
冷落新亭淚罪言毋遽陳讜論已高置可堪三空謀枉
博一官累吾衰多好懷避俗學沈醉攬鏡逢衙官著書
薄賓戲誰酌斗升粟換汝懷中刺平生飛動心蒼鷹期
在臂君行儻歸來射獵尚堪試

君不見二章

君不見六鼇失戴滄溟東陰火熱浪燒長空月魄圓缺
無始終天門蕩蕩多悲風劫灰飛到蓬萊宮孰云江河
灌注成瀛海黃塵走馬滄桑改越裳重譯公當悔中國
徒矜聖人在